

## Mbanjmyauz Canghgyah:

# Luegbya Caemdingh Va Hom Roeg Comz

## 宁静幽远鸟语花香之张家苗寨

□ Siz Yenzlingz

*Faihung laengz raemx gingj gyaunde.*

Mbanjmyauz Canghgyah bya heu raemx saw, gingjsaek gyaunde, seiqgeiq va hom, gizneix miz doengnaz bya raemx hophumx, va-ndoeng roebang guhbuex; miz gij yanghngongh ndik fwn rwed rong-gyoi, va loenq gwnz ngawhrin haenx; lij miz gij luegbya caemdingh ngiengx gyauej raen ronghdwen, ngaem gyauej nyuq hom va, dingdingh naengh dwk dingq non iq hemqswenj, rop rumzhom hauej rungj dem……

Canghgyah Cunh dieg youq rangh gyang Majdiz Yangh Lungz-swnq Gak Cuz Swiyen, gizdieg bya sang nitgyaengj, haijbaz 310-1550 mij, liz yienhsingz miz 35 goengleix gya, daengx cunh 13 aen cunhminz siujcuj, 232 ranz gungh 929 vunz, ndawde 93% gyauejvunz dwg Myauzcuz. Ndaw mbanj miz gep sigbei vuengzdaeq Ciuhcingh soengq hawj ndeu, miz go faexgingq geq maj ndaej 2000 lai bi caemhcaiq riuz aen goj saimbwk doxndiep ndeu, miz doxgaiq hoenz vwnzva Myauzcuz, miz aen daizsaenz louzce baenz cien bi guh caeqbaiq daiq miz gij heiq saenzmaed ndeu, lij miz golimz bak bi, roenbenjrin, suenyoz youqndwi, diegce daizheiq gaeuq, raemx-diuqdat, miuhsaenz cien bi, gizdieg

goepingj daengloengz gyanhaemh Cangh-gyah, fairaemx hung, vagut lai saek Feihcouh ndaemganq gihdi daengj, hawj hekyouz doxcaeh bae daengz ndaw mbanj cwxcaih yawjngonz youzcet.

Doengh bi neix daeuj, Cangh-gyah Cunh gaenxmaenx hwngfat vagut Feihcouh daengj gova ndaemganq, mouraiz Dilingz caeuq bitheu gaeqfungh daengj hong dajciengx, doengzseiz haenqrengz swncienz caeuq hoengzyiengz vwnzva Myauzcuz, leihyung seiz hong soeng, ngoenzciet Myauzcuz caeuq ndwencieng daengj ciet hung guh lai cungj lai yiengh vwnzva Myauzcuz hozdung, gaenxmaenx cujiciz beixnuengx Myauzcuz camgya ndaw yienh ciet vwnzva nazmbaeklae daihingz minzcuz cunzyouz caeuq yienh lajmbanj yezyiz vwnzyi comzyienj, caemhcaiq laemxsim cauxguh aenmbanj miz daegsaek Myauzcuz, cungfaen baijyienj ok gij cingsaenz

ndei caeuq seizdaih caemhbyaij, haenqrengz bae guh, gaenxhong baenz fouq, cauxguh saedcej ndei caeuq gij fungsug fungcingz noengz-nwd naekgywg haenx.

Seizneix, hekyouz daeuj daengz ndaw Mbanjmyauz Canghgyah gizdieg gyaunde yinx vunz neix, ndaej daj ndaw gyang va hom faex heu menhmenh byaij gvaqbae, yawj gingjsaek gyaunde seiqhenz aenmbanj, yawj baijyienj fungsug fungcingz Myauzcuz dangdieg, ndaej cimz gwn gijgwn feih ndaw mbanj, lij ndaej doxiu bae yawj daengngoenz doekbya caeuq fwjhaemh, roxnaeuz naengh youq laj gofaex, gaem cenj caz ndeu, raix vanj laeujhaeux ndeu, caencik baengxyoux doxcomz miz gangj miz riu dwk itmienh gwn caz gwn laeuj, itmienh yawj roebang yaep mbin yaep douh, dingq sing roeg hemqswenj cici caca, caenhcingz bae yiengjsouh cungj saedcej cwxcaih angqyangz haenx……



▲ Hekyouz daeuj ndaw mbanj caez diuq foux angqcoux.



▲ Daem ceizet daih hek.



▲ Hekyouz caemh guh' angq dem nauhyied.



▲ Mehmbwk Myauzcuz guhcaz daih hek.



▲ Bya heu raemx saw hophumx aenmbanj.



▲ Doengxhaemh aenmbanj ronghsagsag.



▲ Roenbenjrin doeng daengz gak ranz.



▲ Baihrog gwnz faqciengz veh fungcingz minzcuz.